

中華全國風俗志 上篇卷四

▲福建一

●總志

風俗之殊。厥與政通。陰陽寒暑之所布濩。山川燥濕之所融結。五土異宜。此繫於天者也。上導之則爲風。下被之則爲俗。此從乎人者也。閩地煥多寒少。氣候中和。上而建劍之溪湍。下而泉莆之潮漲。蒸爲風氣。大率民性柔緩。尙文雅而習華靡。土瘠民勞。善心易生。其大較也。千百年來。常袞蔡襄之所鼓舞。楊龜山朱考亭之所轉移。文教漸摩。海濱鄒魯。論者謂治世豐年。氣象休暇。習尙高於齊晉。是本培化原者之整齊而畫一之而已。我國家同風一道。惠此方民。重臣觀風整俗。輪軒所臨。捷如偃草。比年蒸蒸丕變。協於蕩平。豈非從違好惡。臯制其衷。畢雨箕風。民從其好者歟。遠稽前史所稱者如彼。近驗當今所樹者如此。他日省方問俗。太師陳詩。當與江沱漢廣。歌南國而臻上理。不其懋乎。

隋書地理志云。豫章之俗。君子善居室。小人重稼穡。建安俗頗同豫章。按隋建安郡。卽今八閩地也。

宋史地理志云。民安土樂業。川原浸灌。田疇膏沃。無凶年之憂。嚮學喜講誦。好爲文辭。信鬼神祠。重浮屠之教。土地偏陋。生籍繁夥。雖磽确之地。耕耨殆盡。畝直饒貴。故多田訟。

元貢師泰送李尙書序云。終歲勤勤。僅足給食。

● 福州

晉郭璞遷城銘云。遇兵不饑。遇荒不掠。遇災不染。

圖經云。其俗儉嗇。爭者喜訟。病者好巫。晉永嘉中。衣冠多趨閩。自是畏亂。無復仕者。神龍中。州人薛令之始登上第。其後李椅常袞。皆以崇重學校爲意。於時海濱幾及洙泗。女率作同於男。

本志云。由建劍溪滯而下。泉莆潮漲而上。適至是而平。民生其間。其性舒緩。

閩中記云。產懼薄而勤羨。用喜嗇而實華。自晉宋文雅以來。教化不變。家庠序而人詩書。君子外魯內文。小民謹事畏法。民以魚鹽爲生。

長樂志云。土瘠民稠。男勤耕讀。女尙蠶織。濱海者事漁釣。附山者爲工商。

劉克莊陳公生祠記云。福清土瘠。物貨不產。商賈靡至。君子多業詩書。細民多執

工藝。其俗勤悍。喜爭健訟。爲諸邑冠。

林俊福清城門記云。福清吻海背江。風潮簸嶠。山秃瘠。乏林木。石離離骨豎。人鍾之。

忠特奇峭。次亦凝重自立。

林畔連江貢士莊記云。地瘠民貧。

連江縣志云。習用儉約。人多尙義。治喪不用浮屠。

羅源志云。邑初湫隘。人物寂寞。紹興中。邑令陳偁遷之後。髦士輩出。細民亦知向學。

民淳訟簡。敦尙本業。

宋古田令陳昌期序記云。邑人貴巫尙鬼。景德間李堪令邑禁革巫鬼。民始識仁義。

禮樂知教化。

古田志云。民俗鄙樸。頗好訐訟。

元吳海送鄭訓導序云。古田本昔提封之廣。居民之衆。邑里之華。文物之盛。蓋彬彬焉。

宋常挺閩清貢士莊增田記云。家相率而學。人相率而善。

閩清志云。男耕女織。民不侈靡。

宋永福令黃子理玩芳亭記云。山居之民。終身不知車馬。馳驟之逸。火礬水耕。巖鋤隴蒔。

林岳虛心堂記云。簪纓星羅。絃誦風行。髻亂有文。農工知義。易治而難服。

何喬遠閩書云。福州閩中一都會。西北控甌劍。東南負大海。氣候烜燠。田每歲兩穫。魚鹽果實。紡織之利頗饒。其俗尙文貴節。君子樸而守禮。嫻於文辭。小人謹而畏法。雖負販之夫。相逢衢道。舉手若揖讓。長樂濱海。有魚鹽之利。山多果實。俗儉而用。

足辨貴賤。序長幼。有古遺風。福清背山面海。多瀉鹵。有海舶之利。其人剛勁尙氣。多行賈於四方。以其財饒他邑。連江亦有山海之利。鮮厚貲。其民舒緩而用儉。羅源抗負巖巒。襟帶陂澤。邑居嵐氣如飶。民山耕海漁。僅足自給。俗少文而易治。古田舊曰山洞。陰箐邃壑。嵐氣至午乃霽。地瘠難以蓄衆。壯者多傭於四方。閩清山田。引泉注之。歲收多入。俗務稼穡。而篤於事鬼。永福氣候風俗與古田同。閩清亦信鬼。而悍剽。

●興化

本志云。梁陳以來。已有鄭露書堂。及唐貞元時。林藻伯仲因之肄業。歐陽詹來自泉山原。其所倡儒風。不在常袞入閩之後。

唐僧涅槃識云。此地永不動干戈。

宋黃公度學記云。莆田文物之邦。自常袞入閩之後。延禮英俊。儒風大振。僻在南隅。而習俗好尙。有東州齊魯遺風。

宋陳俊卿對高宗語云。家貧子讀書。

陳俊卿貢院記云。莆介於泉福之間。市廛戶版。不能五之一。而秀特多。

宋游醒通判題名記云。比屋業儒。號衣冠盛族。至今公卿相望。

本志云。詩書禮樂。爲八閩之甲。莆之科目。肇於唐。盛於宋。又盛於明。每科與試者。

視閩居半。與計偕者。視解額。恆得三之一。祖孫父子。兄弟叔姪。登科第者。先後接踵。科目得人之盛。天下罕儷。產薄而用儉。吉凶之需。稱家有無。

宋陳謙道慶堂記云。莆中三邑。仙遊爲壯。邑有四民。士風爲盛。士風盛。故巨室多。

陳堯通楊公塘記云。仙溪民樸俗淳。去末就本。相安壟畝中。熙熙如也。

何喬遠閩書云。壺山蘭水。映帶秀發。故其人好禮而脩文。士相矜以名節。布韋蓬。莫不願化。老生儒宿。出而授經。近地。步趨坐立。造次不失。下至灑削賣漿者。流無敢岸。輒科頭行衢道。貧家觴豆數行。秩秩有序。呶唔之聲。比屋相聞。仙邑倚山。田頗足自資。而少出門。

●泉州

宋王十朋止訟文云。泉在七閩之中。民淳訟簡。素號易治。

圖經云。瀕海者恃魚鹽爲命。依山者以桑麻爲業。大抵皆崇儉朴。好佛法。重婚姻。喪祭以儉薄爲恥。宋張闡曰。泉之爲郡。風俗淳厚。其人樂善。素號佛國。

曹脩睦建學表云。地推多士。素習詩書。

宋志云。愛身畏法。崇遜恥爭。儒者安於閭里。以漂泊爲病。仕者守其塗轍。以奔競爲羞。木少桑柘。婦罕蠶織。冬無冰雪。或不御棉。

明陳叔剛重建夫子廟碑記云。南安去郡治最近。號稱劇邑。深仁厚澤之所甄陶者。六十餘年。百里之間。絃誦相聞。

陳安國儒學記云。惠安瀕海地瘠民貧。

元林泉生大同書院記云。同安多古碑。凡朱子所撰述者。邑人咸能成誦。彼豈爲虛敬哉。

黃銳安溪縣詩云。掌地也成田。

何喬遠閩書云。泉州枕山負海。有荔枝龍眼之利。魚蝦螺蛤。多於羹稻。懸島絕嶼。以網罟爲耕耘。附山之民。墾闢礪确。植蔗糞糖。地狹人稠。仰粟於外。百百技藝。敏而善。傲。北土緹縑。西番彝鬪。莫不能成。婦人芒屨負擔。與男子雜作。其君子無造次辨麗之智。其小人帖帖愿謹。自取衣食。南安土壤滋沃。宜瓜果。其人質率。尙意氣。惠安地少壤多。稻麥番薯。可以支歲。辟纊織苧。有葛屨之風。村落慶弔。用布帛牲穀爲禮。其君子忠信。其小人儉畏而任愨。同安朱子之所過化。其君子勵節。而小人任天。安溪山水清激。其士慊慊。山故產鐵。五方民衣食其中。亦能耗穀而叢警。

● 漳州

宋傅自得道院記云。其民務本。不事末作。

陳淳北溪集云。此間民俗大概質朴謹畏。然其間亦有奸雄健訟。爲善良之梗。使不獲安息者。俗尙淫祀。多以他邦非鬼立廟。此邦陋俗。常於秋收之後。優人互湊。

諸鄉保作淫戲。及弄傀儡。

宋郭祥正淨衆寺法堂記云。閩之八州。漳最在南。民有田以耕。紡苧爲布。弗逼於衣食。樂善遠罪。非七州之比。

本志云。敦尙質朴。務業者多。健訟者少。其民輕死易發。

明王禕詩。文物如鄒魯。奢僭仍民俗。

本志云。民間婚姻。男家務爲觀美。女家極力以求稱之。侈靡無節。親舊之葬。或設祖祭。數月營辦。務求珍異。不計財費。喪家則盛筵席以待之。競爲豐侈。

龍溪記云。業農者近郭之民。業魚者瀕海之民。

宋卓尊爲趙師縉漳浦縣蠲役記云。俗厚訟稀。

南靖志云。其地氣候多澳。田一歲兩熟。苧一歲三收。男力耕稼。女勤紡織。

長泰志云。邑與龍溪相識。地僻人稀。民勤耕織。不好華麗。不事商賈。

何喬遠閩書云。閩中諸郡。惟漳爲剽悍。外發憤訖讎。內實畏法而懼罪。族大之家。多

入海貿易。散之他郡。其君子彬彬有文。翩然意氣。而多自喜於千秋之業。漳浦。其民殷庶。士嫻文辭。海澄有番舶之饒。行者入海。居者附貲。或得窶子棄兒。撫如己出。長使通夷。其存亡無所患苦。長泰爲漳肘腋。市巷四民。率岸幘羣處。

● 延平

本志云。民儉嗇而頗尙氣義。質直而不爲奸詐。家樂教子。五步一塾。十步一庠。朝誦暮絃。洋洋盈耳。楊文靖羅文質李文靖朱文公四先生。倡明道學。稱爲鄒魯之邦。諸儒講道明義。遺風餘教。猶未泯。

劍浦記云。以耕織爲生。

順昌記云。士以詩書相勸。民以耕桑爲務。小民畏刑而寡詞訟。

將樂志云。尙氣而輕生。嫁娶多過乎奢。而喪葬則未盡乎禮。民重去鄉井。

沙縣志云。商賈工技之流。視他邑爲多。

尤溪志云。民鮮商賈。

永安縣志云。土壤肥饒。民俗輕剽。

何喬遠閩書云。延平山川清明挺秀。恆煥少寒。地多險阻。田宜稻。山宜茶。民憚遠出爲商賈。無他役作。而勤於耕耨。女雖至貧。紡績不出戶。是以不至饑乏。而亦無千金之蓄。其君子無脂韋之習。其小人撲齋不敢爲非。順昌介東廣之衝。溪山秀麗。資竹爲紙。賦稅之人不待追呼。橋梁道路。勞力費財。而無斬心。將樂巖岫磊砢。溪流清泚。鄉有苧布之利。其民多技而好勝。喜於爲商。沙縣居延上游。其民儉朴。力作吝財。以含忍勝人。文學之外。習伎藝。精繪事。尤溪萬山之中。土瘠收薄。民多負氣。剽悍。有巫師之傳。習爲符咒。永安巉巖峭壁。俗視他邑爲輕剽。近乎沙者文而靡。折於尤者朴而頑。民習技巧。

●建寧

建安志云。自五代亂離。江北士大夫豪商巨賈。多逃難於此。故備五方之俗。處市井者尙侈而好浮。居田里者劬身而樂業。尙氣而喜節。易鬪而輕生。君子勇於爲善。

小人敢於爲惡。

宋韓元吉記云。其民之秀者狎於文。家有詩書。戶藏法律。賦其厲氣者。亦悍以勁。本志云。秀士狎文辭。重清議。百姓畏官府。男女別途。各勤其身。

盛均序云。民獠黠而易隨。

建安集云。農力甚勤。桑麻被隴。茶笋連山。土風差勝。

朱行中詩云。水無涓滴不爲用。山到崔嵬猶力耕。

本志云。自朱文公倡道東南。彬彬然道義之鄉。擢科第。登館閣者輩出。居畎畝處閭里者。絃誦之聲相聞。貧富不相資。貴賤不相等。華門圭竇之士。皆能挾族譜以推流品。

嶽安志云。民多悍戾。罕尙文藝。自唐李頻爲建州刺史。以禮法治下民。始知文雅。至宋胡文定劉屏山朱考亭諸公繼出。詩書禮樂之盛。幾於洙泗。

浦城志云。士頗以名節自勵。

松溪志云。土風淳朴。人性儉約。地瘠民貧。男務耕稼。女勤織紝。不事商賈末技。何喬遠閩書云。建寧居閩上游。山峻水激。盤行迴鬱。無倒漢瀉瓴之勢。朱子悅而居之。其人之美者。尙氣而有節。其弊也。狷隘趨急。無委蛇之風。其小民忿怒叫囂。輕生樂鬪。市井浮侈。比於杭州。建陽朱子之鄉。士子侈談文公書坊之書盛天下。茶每歲三收。苧每歲四收。崇安爲建巖邑。士敦慤。民少經商。浦城介閩浙間。其地寡田。上彬彬爲禮讓。民勤耕織。以蓄力致富。不煩催科。松溪寒不墜指。暑不蒸人。其民龐儉。商賈有恆業。政和爲建下邑。其田開雲而倚山。其俗勤而儉朴。而近古。無豪家大姓。陵鑠細民。又云。建寧俗多溺女。不愛惜。春蒿縑從。悉絕。其配合。民有白首爲鰥寡者。一有緩急。兒女滿膝之婦。去之不願。貧婦夫死未幾。卽嫁。且贅云云。附載於此。後人或知所警云。

●邵武

晉書地理志云。其俗剛烈峻整。其民尙氣鯁直。

晉郡縣志云。信鬼好祠。俗罕延醫。

本志云。人性獷直。尙氣。治生勤儉。力農重穀。頗好儒。所至村落。皆聚徒教授。有古之遺意。儒雅樂善。輕齋健往。西山得道南之緒。而考亭師友。則蒙谷台溪雲巖月洲理學淵源。上接伊雒。比屋弦誦之聲。洋洋盈耳。當時號小鄒魯。嫁娶尙門地。喪祭用古禮。地狹山多。民隨山高下而田之。高不懼澇。下不懼旱。故無大饑歲。閭巷貧民。未嘗爲富家所驅使。吞併。或遇饑歲。貧者視富者出粟爲當然。富人亦往往應之不拒。

元黃鎮成眞率約序云。邵武山川清峻。俗尙簡易。文書省約。無珥筆之風。使傳稀少。無刮蹄之轍。

光澤縣志云。人性獷直。俗尙朴素。男耕女織。奮用寡好。不樂行商。而生理鮮薄。其於華藻之事。泊如也。

宋樵樓記云。其俗務生。力耕鑿。間崇尙儒術。

建寧縣志云。山厲水刻。故人剛烈而峻整。君子則尙志力學。有遜順之風。小人則
狂鬧喜勝。有獷暴之氣。山多田少。人無甚貧富。故俗安於朴素。而不事華靡。重
送終之禮。雖貧者亦不肯火葬。

沿革記云。邑介汀邵間。去郡城最遠。土俗剛獷。民易動難安。調馭有方。則怡然聽命。
泰寧縣志云。獷直尙氣。少爲商賈。耕織自給。不爲浮華。

宋葉祖洽改縣名記云。邵武四縣。惟泰寧最僻。不與四方商旅交。故習俗淳厚。處
深山窮谷之間。有林泉魚稻之樂。人自足用。無所外求。比屋連牆。弦誦之聲相聞。
有不談詩書者。輿談笑之。

何喬遠閩書云。邵武縣與光泰二邑。皆力田樹藝。鮮商賈。商賈亦不至。地狹民衆。財
源鮮薄。其俗纖儉。安於食稻而茹蔬。建寧土地膏腴。專有魚杉油漆苧麻之利。以
通商賈。郊於建昌。染爲奢俗。其諺曰。千金之家。三遭婚娶而空。百金之家。十遭宴賓
而亡。

● 汀州

宋陳一新瞻學田碑云。風聲氣習。頗類中州。

圖志云。氣剛愎而好鬪。心褊逼而淺中。

本志云。島居者安魚鹽之利。山居者任耕織之勞。

元志云。君子質直好義。而恬於進取。小人原慤少文。而安於勤勞。

寧化縣志云。男力稼穡。而不爲商賈。女業麻苧。而少事蠶桑。勇悍輕生。

清流縣志云。民頗健訟。

歸化縣志云。專好浮屠。罕尙文藝。尙質好儉。輕訟易爭。

連城縣志云。土壤礲瘠。人民貧嗇。

上杭縣志云。奢侈日滋。詞訟日熾。

武平縣志云。專事師巫。不任醫藥。尙武少文。

永定縣志云。貧者栽山種畚。而鮮行乞於市。

何喬遠閩書云。汀州士知讀書進取。民安稼穡。少營商賈。富家守禾畝。貧夫力山畝。僕隸下人。各治生業。麀無行貨之婦。衢少伏地之丐。室無怨曠。其子女不鬻他鄉。奢汰不競。兇訟少聞。寧化居汀上游。田疇鱗次。草木綿蔚。男耕女織。人物富庶。而氣性剛愎。清流山高。引泉代汲。激湍代舂。民樂農圃。編竹爲蔽。闔市無遊女。宦遊人語曰。清流爲縣。家懸竹片。任官數載。莫覩閭面。民趨健者。多刺船建劍汀邵間。歸化質直好儉。力耕種。重遷移。民至貧餒。不敢爲非。連城土瘠民貧。工務勤勞。女安儉朴。民多入他郡治版築。上杭士子勤學問。衣冠文物。頗類大邦。百貨俱有。武平山峻地僻。人多武勇。永定僻壤。山峻水駛。其人樸愿。少文。崇尚廉恥。士甘自守。其俗弔死問疾。有相關之誼。然頗悍勇。輕生喜鬪。

●福寧

本志云。漢晉以來。俗尙樸素。自唐林嵩擢高科。爲一邑倡。厥後文人才士。彬彬輩出。附山者務農桑。瀕海者業海鹽。喪葬尙浮屠。嫁娶不親迎。